



樂善堂全集卷七

序

貞觀政要序

夫三代以上君明臣良天下雍熙世登上理自
東遷以降風俗日薄天下無復熙皞之美雖有
質美之主望治甚切而所以屈已從諫力行善
政者終不能有以震古而鑠今及唐貞觀太宗



以英武之資能用賢良之士時若房元齡杜如晦魏徵王珪諸人布列左右相得益彰蓋自三代以下能用賢納諫而治天下者未有如此之盛焉史臣吳兢纂輯其書名之曰貞觀政要後之求治者或列之屏風或取以進講元至順間戈直又刊其書以行於世余嘗讀其書想其時未嘗不三復而歎曰貞觀之治盛矣然其所以

致治則又在於用此數賢而數賢之中又推魏徵裨益爲多然魏徵不能自必信用於太宗以見其功業則又知太宗所以獨信魏徵言聽計從而見效若彼者固人君所當服膺書紳而勿失也書中分目目中有條條之末引先儒之言而論斷之其有望於後王也深矣人君當上法堯舜遠接湯武固不當以三代以下自畫然觀

爾日君臣之所以持盈保泰行仁義薄法術太
宗之虛已受言諸臣之論思啟沃亦庶幾乎都
俞吁咈之風矣

韓文公文集序

天下之事有其藝則必有精於其術無論小大
精麤能使機應於心技疑於神則外物不能紛
而後之習其藝者皆奉以爲師法養叔治射離

婁治規矩師曠之於音聲倉公之於病匠石之
斤公孫之舞皆造其堂而躋其殿傳之後世而
無窮夫文亦天下之一藝也精其術可奉爲師
法者周有左氏漢有賈誼董仲舒馬遷相如劉
向此數子者雖非見道之文要皆卓自樹立不
合流俗而其文之古朴亦非浮華澆漓者所能
及迨自五代剖分文弊質窮天下之言文者務

以藻績爲事媿媿如婦人言世道衰微人心由之僞薄至唐并天下蔚興文教殆百餘年而後昌黎以六經之文鳴天下由是言之文之係於世道人心亦大矣蓋昌黎之於文所謂造其堂而躋其闕因文以見道以蘄至於古之立言者也其自用之功在於培養仁義以爲立言之本而其所得之趣則氣盛而言之短長與聲之高

下皆宜至其不蹈襲前人一語不煩繩削而自合規矩不顧世人之笑譽反刻以樸刻僞以醇粹然一出於正後之習文者皆奉爲師法而莫有能加焉噫亦至矣雖然公非徒長於文者其道德謨猷皆有唐一代之特出而不能大顯於憲穆之朝者氣運之遷流非人力所能挽耶抑使之少抑於一時而終揚於萬世耶將全於此

樂書全集卷七
四
則不能全於彼耶孟子距楊墨而道以之傳昌
黎排老佛而道亦因文而見起衰反正始若未
之信終大顯於時蘇子瞻以之上擬孟子豈過
譽哉

杜子美詩序

夫自上古康衢有擊壤之歌虞廷有卿雲之詠
帝與臯陶禹益諸臣救命賡歌拜手颺言於一

堂歌詠之興有自來矣爰逮姬周公旦公奭調
宮協徵律其節族春容乎大篇堂皇乎雅辭化
自二南達於列國上自公卿下至黎庶至於變
風變雅亦莫非忠臣義士摠其忠悃發爲歌辭
好色而不淫怨悱而不亂皆可以勸懲當時爲
教後世詩三百一言以蔽之曰思無邪孰謂詩
僅緣情綺靡而無關於學識哉然三百篇之詩

不拘格律而音響中度所謂大羹不和而有至
味也漢變四言為五言間亦有七言之體至魏
晉而音韻愈盛入唐而格律益精鹽梅之設大
羹之害也七竅之鑿渾沌之賊也至有不言性
情而華靡是務無勸懲之實有淫厲之聲於詩
教之溫柔敦厚不大相刺謬乎是以言詩者必
以杜氏子美為準的子美之詩所謂道性情而

有勸懲之實者也抒忠悃之心抱剛正之氣雖
拘於音韻格律而言之愈暢擇之益精語之彌
詳其於忠君愛國如饑之食渴之飲須臾離而
不能故雖短什偶吟莫不睠顧唐祚繫心明皇
蜀中諸作尤致意焉屈原放逐離騷是作後代
尊之為經子美之詩亦因其顛沛流離抱忠秉
義不究其用垂於詩以自見故後世宗之參之

樂善堂全集 卷七 六
於三百篇之列若夫較一字之長爭一韻之巧
摘華藻於篇章誇博瞻以耀衆者藝也非所以
求子美也

朱子資治通鑑綱目序

孔子作春秋而亂臣賊子懼夫春秋亦一編年
之書而曰亂臣賊子懼者蓋謂彰善癉惡比事
屬辭誅姦諛於已往杜僭亂於將來使亂臣賊

子不畏王法者讀此書而知懼豈非有功於世
道人心者哉三代而下孔子之道幾乎息矣故
臣叛其君者有之子背其父者有之而亂臣賊
子無所忌憚子朱子生於周程之後修明絕學
深痛而甚憫之祖夫子春秋之筆削因溫公通
鑑之書更創義例爲書曰資治通鑑綱目其自
序曰表歲以首年因年以著統大書以提要分

注以備言洵哉善善惡惡是是非非具於一篇之中而無不備矣然後人知忠臣義士必獲天休也雖不用於一時而後世莫不裒歎效法之恐後也亂臣賊子必撻天誅也雖幸免於當世而千載以下公議莫逃也彰善癉惡比事屬辭雖不足以盡春秋之義抑其大略則可謂同揆矣夫三代以下傳世久遠者莫如漢唐當其盛

時政教恩澤入民之深非不可稱然其易代之際死君事者可數焉自修綱目之後士知顧禮義廉恥以事二姓爲辱故南宋之末忠臣義士捐軀而徇王事不肯忍恥偷生以求苟活者屢見於史策之中且元代宋明代元無分析割據如前五代後五代之亂者亦因忠姦賢佞褒嘉貶斥凜若袞鉞人知有所懲勸懼見誅於後世

也如是而謂之綱目修而亂臣賊子懼其誰曰不然

大學衍義補序

學貴於博乎堯舜心傳十六字有終身不能行其一語者焉學貴於約乎往聖先賢作述相接有言之而不厭其詳者焉大凡言理則欲其精簡明切當而易守也言事則欲其詳條分縷析

便於中材而易行也吾於邱瓊山大學衍義補蓋知其義云夫聖經二百有五言爲學之道備焉爲教之法具焉爲治之理盡焉所謂理極精而易守也至於後世道衰文敝賢者且不能窺聖經之闡奧又何怪於中材乎故西山先生作衍義之書至齊家而止而治國平天下之道備具不待瓊山之補然亦不可無瓊山之補所謂

樂善堂集 卷七
多備規軸而易行也聖人言理賢人言事先代
言理後世言事亦學有所不齊世有所不同而
所以啟迪當時爲教後世之心則一也然於此
亦可以見瓊山之有志於君民上下言事極其
詳而言理亦極其精矣至其書之條目義例則
詳於邱氏之序余因嘉其明於理而便於事故
爲序如右

送五弟奉

命往祭

闕里文廟序

雍正八年冬十月新修

闕里文廟告成殿廡門陛黃瓦丹雘旣宏旣隆

圭瓚俎豆樽彝之器

頒自上方

聖天子親書大成殿大成門匾額復命良工重摹

聖祖御製文廟碑文孝思繼述重道崇儒兼備於此既成例宜遣官祭告

皇父特重其禮

命皇五子齋居潔誠治裝減從以行余與吾弟夙夜之與俱飲食之與共講習討論之日親至

於今二十年茲往千里之外能無依依繫戀而不忍舍顧思人自孩提以至於老大讀孔子之書未必能志希賢聖窮理探源以至於知孔子之道也幸而知之矣而私累之未捐精進之不勇則鮮能行之既行矣未有不心慕孔子欲登其堂而入其室者吾弟力學敦修不敢自懈於聖人之道者有年矣今奉

命往祭闕里瞻宮墻之數仞則欲得其門而入
以見宗廟百官之美富也對聖貌之巍巍則思
溫厲恭安如在其上而自省其躬修也遊禮樂
之區想見金聲玉振之氣象是行也不益以增
其嚮往服行之心而為有生一大快乎

皇父猶有後命命吾弟祭闕里畢即往致祭岱
宗吾弟往哉昔孔子嘗登泰山而小天下孟子
述之蓋謂得登聖人之堂與聞聖道之精深廣
大則諸子百家羣言皆小也猶之登泰山之高
者得觀其嶽岑峻極則剡施培塿皆不足言也
吾弟既登聖人之堂又登泰山之高誠敬之日
積仰止之日深視瞻之廣濶胸次之豁然古文
人學士所謂遊名山大川以助其文思筆力者
又烏足云哉

送平郡王奉

命往盛京修理

福陵前河道序

皇清承

天命為天子

太祖肇基盛京奄有三韓

太宗積功累仁式廓疆宇以及

世祖拯明室之亂興仁義之師平一六合定鼎

燕京順治八年

詔封

福陵山為天柱山

昭陵山為隆業山附祀

方澤四時大祭必命宗室一人往蒞其事雍正

八年四月

詔曰

福陵前水法歷年既久稍更故道朕萬幾事重不能親往經理惟是平郡王福彭小心畏慎克當斯任其代朕以行余與王敬業樂羣相晨夕也茲之往也其可以無贈竊惟古者山川都會恒隨有德者為發皇我

太祖之肇基盛京義同於周文王之在豐我

世祖之定鼎燕京義同於周武王之在鎬盛京為王業之不基而

福陵實靈祥之所由孕育綿衍今以前河稍更故道

聖天子慎重所使

特命王往王其慎哉祇謁

皇祖山陵敬恭將事宏仁孝之思審向背之勢

詔曰

福陵前水法歷年既久稍更故道朕萬幾事重不能親往經理惟是平郡王福彭小心畏慎克當斯任其代朕以行余與王敬業樂羣相晨夕也茲之往也其可以無贈竊惟古者山川都會恒隨有德者爲發皇我

太祖之肇基盛京義同於周文王之在豐我

世祖之定鼎燕京義同於周武王之在鎬盛京爲王業之不基而

福陵實靈祥之所由孕育綿衍今以前河稍更故道

聖天子慎重所使

特命王往王其慎哉祇謁

皇祖山陵敬恭將事宏仁孝之思審向背之勢

必能相地宜因利便計丈數度高卑揣遠邇物
土方分司授職董其大要而責以成功以不負
天子任使王其可以勝任而愉快矣王雖年少
而器識深沉謙卑自牧嫺學問通事理余喜王
之果足以當斯任也於是乎書以贈之

送定邊大將軍平郡王西征序

惟

上帝眷顧我國家

太祖

太宗肇基盛京既創既承順天休命以造萬世
無疆之不基惟時英藩良弼罔不一乃心力克
宣乃猷董疏附先後奔走禦侮之臣而甄其才
以致其力用贊我王室式闢四方若川有舟實
共濟之若木有本實枝幹之詩所謂惟蕃惟垣

樂善堂集 卷七
惟屏惟翰偉哉隆古以來懿親之宣力未有若斯之盛也逮我

世祖章皇帝定鼎燕京奄有九有惟時平郡王之始祖禮親王實統貔貅之旅以勤襄王事功績彪炳載在國史王其七世孫也王幼而侍聖祖仁皇帝宮中躬承恩眷我皇父臨御凡事皆仰體

聖祖之心祇承勿替況在宗藩尤所惇叙以養以教罔不勤勗其身誘迪厥德而王以孫枝之近眷顧尤隆雍正六年

皇父特命王同我兄弟讀書內廷以培其才又二年知王之可用也爰命管理旗務及爲宗正理益以明政益以練又二年知王之果可大用也遂有定邊大將軍之命而統西征之師夫準

噶爾自策妄阿喇布坦造孽據有波羅塔拉背我

聖祖皇帝曲賜矜全之恩及我

皇上赦過宥罪之德跳梁躑躅至於今十餘年今其醜子噶爾丹側撻襲其凶逆抗我顏行幸不可再禍不可踵此蓋天亡準噶爾之日而王建功立業之秋也玉器量寬宏才德優長在書

室中與之論文每每知大意而與言政事則若貫驪珠而析鴻毛也夫戰者孔子所慎王者不得已而用之所以止戈戡亂遏劉誅暴我皇上克承

先志思維小醜累世負恩實天人所共憤王法所必誅而歷年以來董兵之臣率不能宣德威而奏膚功用是以西陲重任畀之於王王必有

以副

皇父簡用之恩佐國家赫聲濯靈之大業相事
宜慎權變和輯我士卒淬厲我將校恩威並行
信義昭著克殲逆愍永息邊氛皇哉堂哉莫與
京矣王以八月三日之吉禡旗啟行余與王敬
業樂羣者六年於茲今之往也其可以無贈然
惟贈人以物不若以言之爲切也贈人以頌不

若以箴之爲益也言而以箴宜贈王矣復念王
日承

皇父聖謨凡軍機要務制敵御將之方籌餉治
兵之略聞之熟而奉之謹以是始之以是成之
總不出

聖天子定算之中而更何俟余之以言贈哉故
爲王敬述王祖父爲國宣力勲名赫奕之事於

右及引書傳所言者欲王效法乃祖而以敬謹將事也王其勉之哉祇迓天之明命惟聿將其恪恭整我六師以伐不敬在此行乎在此行乎余自今數王至軍之日請勒爲飲至之歌以俟之

送毅菴鄂先生奉

命經略西陲序

國家承

天景命作述相承基命篤祐溥海內外罔不懷風嚮仁奉朔惟謹同軌同文以承大化康熙十六年厄魯特噶爾丹始與喀爾喀構釁強并其部驅其男婦而臣之擄其馬牛羊以萬計喀爾喀故臣服我叩關請命我

皇祖聖祖仁皇帝一視同仁不忍憖視

命大臣往諭和噶爾丹狡詐性成內怵王師託
言罷兵猶自窺伺出沒攘竊靡寧三十四年遂
逐喀爾喀闌入我烏闌布通之地我

聖祖謂是方命不庭日益以逞顧可視為甌脫
以梗聲教自將由中道大將軍伯費揚古由西
道尅期進勦曾不百日膚功克奏噶爾丹窮竄
荒漠雉經以死其姪曰策妄阿喇布坦者逃居
波羅搭拉喙息自存我

聖祖恢天地之量舍在釜之魚而資之金革泉
布馬駝牛羊之屬俾食其封以扞遐陬是準噶
爾之得以偷生食息於一隅幸遭天誅者皆
聖祖之賜也後衣食漸裕生齒漸繁思效噶爾
丹所爲稍雄長於西北隅又侵掠我哈密夫背
恩負德天人所憤況在

樂善堂之有之 卷七
大君赦之九死而俾之生乃敢擾我邊氓以抗
鎮戍之師較之高宗鬼方之誅宣王獫狁之伐
義所必征法不容赦此我

聖祖伐準噶爾之師所以不得已以興也我
皇父誕膺寶祚宅中建極觀光揚烈赫濯聲靈
謂討準噶爾厥績未成不敢以弗終今其子噶
爾丹側楞又兇頑桀驁草蔓蟲拏匪剪伊除難

以煦沐雍正六年

命大將軍公富爾丹由北路大將軍公岳鍾琪
由西路進師所以成先志威示遠夷惠我臣民
至深至厚十年壬子秋七月

皇父以兩路之師久未奏凱惟我士卒雨沐風
梳歷有歲年思簡賢能重臣往經理宣撫之用
摩拊庶士且相事宜以旣厥績而難其人大學

士毅巷鄂先生毅然請行

天子以先生贊襄變理護調元氣不可旦夕離顧念斯事體大非先生不可

特授經略之任以三閱月爲歸期凡冠紳衣履朝夕飲食之所需信宿廬幕之具車馬弓劍錡釜之屬

特命內府製備以行余聆先生之教有日矣茲

之往也其可無一言以贈竊惟先生之總制滇南也夷氓雜處好人怒獸摩拳椎胸易以構亂前年烏蒙之叛先生實以威勇鎮靜不數月而平之今準噶爾蠢爾小醜跳梁躑躅天奪其魄亡在朝夕先生此行撫輯我士卒教誡我邊吏慰安我黔黎審天時察地理運之樽俎帷幄之間而挫敵鋒於不戰奚必親教之搏力勾卒羸

越之法徒以師武臣力爭能蓋先生之威信所
播者廣而凱歌可不日而奏矣昔唐憲宗之平
淮蔡也告功不時實命丞相裴度往經理之度
至而淮蔡旋定夫憲宗特有唐一英主耳有裴
度爲之輔用能破淮蔡於數月之間我

皇父首出之聖遠邁漢唐先生才望倫於裴度
而準噶爾又非中州內地而困處窮荒其亡可

立而待詩曰王命召虎式闢四方書曰爾衆士
同力王室尚弼予欽承天子威命請以詩書所
陳爲先生西行之祝

送桐城張先生暫假歸里序

昔在隆古盛治之時熙皞成風明良合德嵩生
嶽降蔚爲國華涵濡徧乎庶類福祚綿乎萬年
良以太平之治久道化成碩德瑰才紹修家緒

惟朝廷有閔閔之臣斯閭閻沐忠孝之化其太
和醞釀豈偶然哉商之興也伊尹輔湯而伊陟
實佐太戊周之盛也太公望爲武王太師其子
伋爲成王虎臣周公輔冲子伯禽征淮戎斯皆
父子濟美宣力王朝詩書所載亦罕與儔匹故
乃書之旅常銘之彝鼎煒乎煥乎流光奕禩而
無窮豈徒臣子之榮抑亦邦家之光也吾師少

保相國桐城張先生乃前相國謚文端子也文
端以忠純清亮遭遇

皇祖聖祖仁皇帝始則侍從經幃繼則贊襄綸
閣一德同心有孚交泰當啟沃之論思密勿從
事而郅理覃敷遐邇被澤孰非

一人元良賢輔宣猷之明效哉逮我

皇父臨御孝思錫類念舊親賢惟時吾師已貳

天官

皇父重其器量嘉乃忠盡寄以心膂股肱不數
年而膺台鼎之命

聖皇有知人之明良臣抒遇主之悃魚水之喻
曷以加茲我國家承

天景命錫以元輔篤生王國俾奏厥績用襄億
萬斯年之治繼繼承承共綿弗替若師之揚其

家聲箕裘聿紹一門之中世掌鈞衡德業彪炳
卓越等倫有光其前有裕其後實天之栽培錫
慶者獨厚而考之書傳近世以來所未嘗有也
雍正八年

天子褒錄國初以來公忠貞亮之臣始終勤勞
名節克著者

命建賢良祠於京師既又

賜祭於其里而文端首膺是典吾師例得旋里
承祀事我

皇父念幃幄重臣朝夕佐理之是資自

御極以來未嘗頃刻離左右者惟吾師一人是
不可去顧以宗功元祀其嗣克繼厥美

殊恩渥澤後先同符者亦惟吾師一家而因

襲錫先庸之命爲光榮錦里之旋尤極千載盛

事用宜

允請暫假俾遂其情並以彰忠孝之徽標式臣
民且重頒內府珍奇凡衣服書籍文物輿馬之
需莫不備具榮其行也余惟天地無心以生物
爲心不寧生物而凡物之足以資生理者天必
有以嘉佑之長養之水能潤物也使之流而不
窮火能烜物也使之傳而不熄五穀萬民之所

樂善堂全書卷之七
三
食而風雨寒暑無非元氣運行使之發生成熟
以爲生民乃粒之計況乎人之能長民者在一
鄉則一鄉受其惠在一邑則一邑受其惠則夫
司台鼎輔

聖明功贊變理而不自居慮周海宇而常若不
足其承

皇靈而宣德澤固胥天下受其惠者也其有不

獲天心之默佑而嘉祉便蕃受茲多福者哉師
之歸里而將祀既有以明夫上天報善之理歷
久彌新

天子酬庸之典有賢必錄文端教忠之報繼世
其昌而騶騎所至桑梓之民白髮黃童莫不指
之曰是佐吾

皇宣布德化之相國張公也或曰是前相國之

樂善堂全集卷七
子能肯構而紹曩徽今復爲相國者也或曰吾
相國速歸朝以承

元后澤我黎民也周書君牙所載厥有成績紀
于太常紀在官也畢公之命曰表厥宅里樹之
風聲表在民也孰若先生被

隆恩祀故里章先美型鄉邑令聞播四海芳蹟
耀千秋事竣還京佐

黻座以出治用欽承

天子之光以裕國慶而綿家祥豈特先生益篤
教忠之念哉將見天下之士於是乎大勸故於
其行也樂書其事以序之

樂善堂全集卷七

